



ФИЛИПП ШАГЪРИЪ АЙИ ХЪУГЪРУДАРИЗ КАГЪАЗ

Филипп шагъриз Павел, жара халкъариз Ужувлан хабар раб-гъуз кьюбпи ражари сиягътназ удучІвган, гъафну. Европайин жилариин Исайихъ хъугъдар сифте вуди гъадму шагъриъ ачмиш шулу. Ужувлан хабар рабгъура кІури, гъаддин кІулан Римдиъ дустагъ дапІнайи Павелихъди гъаму шагърин хъугърудариз Гирами Рюгъну кагъаз бикІуз мажбур гъапІну. Павел чан суддиз ккилигурайи. Дугъан, учв гъякъ дапІну, азад апІур кІури, миж айи. Филипп шагърин хъугърударин пулин кюмекниинди, чахъан чпихъна гъюз шлу мумкинвализ Павели чухсагъул кІура. Исайин вакилин юкІв, дурар чпиз алахъурайи читинвалариз дилигди, Иса Месигъдикан вуйи Ужувлан хабарниинди яшамиш шулайи-ган, марциди шадвали абцІна. Гъаму кагъзин кьюбпи кІулин 6-11-пи цІарари адми гъяйран дапІну дерккру. Душваъ, ас-ккан гъапІу Месигъдикан гъевеслуди ктибтура. Месигъдин табигъ'валикан вуйи му ктибтувал сифте Исайихъ хъугъдарин арайиъ гъеле сабпи шагъидвал ву. Кагъаз, дустагъдиъ дибикІ-найивализ дилигди, шадвали абцІна, гъаз гъапиш Павелин Филиппдиъ хъугърударихъди ужудар аьлакъйир а. Фицики дурар чпин хъугъувалишин ижмиди дийигъна, мугагъназси гъамусра дурар жара хъугърудариз кюмек апІуз гъязур ву. Мидлан савайи, Филипп агълари Месигъдилан улар алдадагъри, Дугъан масанвал, дирбаиш'вал ва инсанарин гъуллугънаъ хъувал кІваин алди ккунду, кІура Аллагъдин Рюгъну. Чан шадвал Дугъу гъаму тухъ



ва важиблу цIарниинди ухьухьна рубкьура: «Ихь Агъайиъ саб духьну, гьаммишан шадвал хъанIай, хъана кIураза: шадвал хъанIай!» (4:4).

1 ¹Месигь Исайин гьуллугъчйир вуйи Павелихъанна Тимофе-йихъан – Филиппдиъ айи Месигь Исайихъди саб вуйи Аллагъдин хьугърудариз, гьадму хьугърударин ахьюдарииз ва дура-рин кюмекчйирииз.

²Уж'вал ва мясляаьт учвуз, ихь Адаш Аллагъдихъан ва Агъа Иса Месигъдихъан!

Павелин миннат

³Гъар ражари учву кIваин апIури, узу йиз Аллагъдиз баркал-лагъ кIураза. ⁴Гъар ражари учвхъан ккарагруган, узу шадвалиин-ди ккарагури шулза, ⁵гъаз гъапиш учву Ужувлан хабар рабгъбаъ сифте йигъариланмина гьамусдизкъан иштирак шулачва. ⁶Учвуъ гьадму ужуб ляхин Ккебгъури Месигь Исайин Йигъазкъан гьад-му ляхин гъабхиди ва гьадмуган ккудубкIиди.

⁷Дугъридан, учвухьна вуйи йиз гьиссар ари гъацдар духьну ккунду! Узу дустагъдиъ айиганси, адруганра – узу Ужувлан ха-бар, дид'ин алжагърударихъан уьхюрайиган ва думу дугъри ву-йиб тасдикъ апIруган, узуси учвура гьадму ужувлан гьуллугънаъ гъахьунчва. ⁸Месигь Исайин Чан юкIвси йиз юкIв фициб убцру масанвалиинди учвухьна вуйиш, магъа Аллагъ шагъид ву! ⁹Узу, ичв масанвал хъана артухъ ахью хъпан бадали ва гъякъ аьгъю-валарина сагъу фагъумлували учву ацIбан бадали, ккарагураза. ¹⁰Гъаддиз учвхъан учвуз ужубсиб гъядябгъюз хьибдичвухъан; учву Месигь хъадакнугъюру Йигъан марцциди ва саб тахсир ктарди гъуздичва; ¹¹учвхъан Аллагъдин ад ва тяриф апIуз шлуси, Иса Месигъдин кюмекниинди гъякъ'валин бегъер хуз хьибдичвухъан.

Павели аьгъ апIурайи дарвалари Аллагъдин ляхнарииз кюмек апIура

¹²Учвуз аьгъяди ккундузуз, гъардшар: узухъди гъахьи гъядисйир Ужувлан хабар рабгъуз кюмек гъахьну. ¹³Римдин паччагъдин ху-лан гьулугънаъ айи эскраризра ва вари жарадаризра узу Месигъ-дин кIулан дустагъдиъ итнайиваликан аьгъя. ¹⁴Узу дустагъдиъ



итну кІури, Агъайихъди саб вуйи гизаф гъардшар, саб юкІв айиганси, уч гъахъну ва хъана ачухъди ва гучІ ктарди Аллагъдин гафнакан ктибтури гъахъну.

¹⁵ Дюз гъапиш, дурарикан сакъюдари Месигъдикан хабар чпин арайиъ бахилвал, талит ади дебккра, хъа жарадари – ужудар ниятар ади. ¹⁶ Му адмийири мици узу ккунивалиан апІура, дурариз, узу, Ужувлан хабар уьбхюз кІури, Аллагъди дерккнайиваликан аьгъа.

¹⁷ Хъа гъацдарра аки, Месигъдикан хабар чпин хайирнахъди рабгъурдарра. Дицдари Хабар марцци кІваан рабгъури шулдар, дурари дици, узу йитІнайи зунжрар ижми ва гъагъи апІуз ккунди айидариси апІура. ¹⁸ Фу пухъахъа? Дурари чІуру вая марцци ният ади кІурашра, Месигъдикан кІура – гъаддиз узу гъацибдизра рази вуза.

Узу шадвали ацІдиза, ¹⁹ фицики ичв ккарагбарина, Иса Месигъдин Рюгънан кюемкнуну ва гъамци хъпу узу азад апІруб, аьгъязуз. ²⁰ Му йиз ижми умударихъдина ккилигурайиваларихъди сабси гъюра. Ва, гъаци вуйиган, узу нач шлуси апІидарза, хъа мугагъназси гъамусра гъаци кІубанди хъидиза, ва, узу чІивиди гъузишра, гъачІишра, йиз бедендиъ Месигъ за дапІну хъиди. ²¹ Фицики йиз уьмур Месигъ вуйиз, аьжал – узуз гъурубкъу мутму. ²² Хъа эгер узу йиз бедендиинди яшамиш шули гъузиш, узу бегъерлуди лихувал хъибди. Гъаци вуйиган, узу узуз фу ктабгъурушра, аьгъдарзуз. ²³ Йиз ниятназ дилигди, гъадму къюб рякъкан узу саб рякъ ктабгъну ккунду. Узуз, му дюн'яйиан душну, Месигъдихъди шлу рякъ ктабгъуз ккундузуз, мици гъабхънийиш, икибаштІан, лап гизаф ужу вуйи. ²⁴ Хъа узу му дюн'яйиин гъузиш, ичв хайирназ хъибди, гъаддиз, мунуб рякъ хъа гизаф ужуб ву. ²⁵ Му гъаци вуйиган, узу гъамушв'ин гъузруб аьгъязуз. Узу, учву хъугъувалиъ улихъ гъагъюз ва ичв хъугъували хурайи шадвал артухъ хъуз, учвухъди гъуздиза. ²⁶ Узу хъана учвухъна гъафиган, узлантина Месигъ Исайиинди хъа артухъ фурс апІуз хъибдичвухъан.

²⁷⁻²⁸ Фицдар гъялариъ ахъишра, Месигъдин Ужувлан хабар ктибтуз лайикълуди гъузай! Узу учвухъна гъафиган, рякъъруси, хъа гъюз дархъиш, узуз ебхъруси саб хилди, Ужувлан хабар бадали, жафа зигури ва гъич сарихъдира учвуз гучІ ккапІуз гъидритди яшамиш йихъай. Гъамциб ичв дирбаш'вал дурариз чпи тІанкъ



шлувалин лишан хьибди, хъа учву дюрхну хьиди, мурар вари Аллагъдин ляхнар хьиди. ²⁹Аллагъди учвуз Месигъ бадали хъугъувал ва Месигъ бадали аьзабар аьгъ апІуб тувна. ³⁰Фицики узу, учвуз рябкъюри, ичв улихъ гъубхубсиб дяви учвура гъабхурачва. Узу думу, учвуз аьгъюганси, гъамусра гъабхураза.

Сар-сарин гъайгъушнаъ йихъай

2 ¹Эгер учвуз Месигъдиъ ккарцувал аш, эгер Дугъан масанвал учвуз шадвал вуш, эгер ичв арайиъ Рюгъниинди гаф-чІал аш, эгер ичв арайиъ рягъимлувал ва язухъ зигувал аш, ²йиз юкІв гъубкІну шад шлуси апІинай: вари юкІв хъипну, вари сабси ккун апІинай, саб жанси саб рюгънаъди йихъай ва сабсар фагъмар-фикрар ишричвуъ. ³Жвуван заанвал, ясана тяриф бадали, фукІара мапІанай. Хъа жвувтІан багахъ хъайир заанди дисури апІинай. ⁴Учвкан гъарсари неинки чан, хъа гъацира имбударин хайирнаканра фикир апІри!

Мисал – Месигъ

⁵Месигъди фици фикир апІуйиш ва гъапІри гъахънийиш, учвура гъаци апІури гъузай.

⁶Думу учв Аллагъ вушра, Аллагъдихъди сабси, Аллагъдихъан хъичІихну гъузундар. ⁷Хъа, Чаина лукІвал гъадабгъну, Учв асккан гъахъну. Думу адмийириз ухшар айир гъахъну. Думу зиълан адмиси духъну, ⁸гъациб саягъниин разиди гъузну, тап чан аьжал хъайизкъан, думу, аьжалра фициб аьжал – чавра хачриин, мютІюгъди гъузну имийи! ⁹Гъаци хъузди Аллагъди Думу варибдин зиина за гъапІну ва ччвурра Дугъаз варидаринтІан заан вуйиб тувну – ¹⁰Исайин ччвурнан улихъ гъарсабди икрам апІбан бадали завариин али, жилариин али ва жиларикк ккайи варибди, ¹¹гъарсаб мелзну, Иса Месигъ Адаш Аллагъдин адлувализ вуйи Агъа ву, кІури, ччвур бисбан бадали.

Аллагъдиз учву фицдар духъну ккундуш, гъацдар йихъай

¹²Йиз ккунидар, узу учвухъди хъайиган, учву, фициб аьшкъниинди узуз мютІюгъ духъну, лихуйиш, гъаци зурба аьшкъ кади, гъюрмат ади ва гучІвал хъади, узу учвухъди хътруганра, ичв уьрхювал тамамуб хъпан бадали, лихай. ¹³Фицики иллагъки Аллагъди,



Чаз ккуниб апІбан бадали, ичв тмягъ арайиз хуру ва ляхнарихъ хъаъру. ¹⁴ Мурмарарна гъожатар дарапІди, вари апІнай. ¹⁵ Ва гъадмуган учвук гъич саб тахсир хъибдар, марциди гъуздичва; намусна гъир'ят дудубгнаи ва улдугнаи инсанарин арайиъ Аллагъдин марци веледар хъидичва. Чиркиндарин арайиъ, йишвандин мучІушнаъ акв туврайи хъадарси, йихъай. ¹⁶ Гъациб жоурейиинди уьмур хурайи Гаф гъайибхай! Месигъдин Йигъан узу йиз рякъ давди ккадапІундайза ва давди жафйир гъизигундайза кІури, учв'инди фурс апІдиза!

¹⁷ Аллагъ бадали апІурайи ляхнариъ ичв хъугъувалин гъуллугънаъ хъпаъ йиз ифи удубзурушра, узу шад хъидиза, учвухъди сабси шадвал хъапІдиза. ¹⁸ Ари гъамциб жоурейиинди учвур шадвал хъапІну ккунду, ва ичв шадвал узухъдира пай апІуз шлуси гъузай!

Тимофейиканна Эпофрадитдикан хабрар

¹⁹ Агъа Исайи, багарихъди Тимофей учвухъна гъауз шул, кІури, умуд тувразуз, дугъу ичв ляхнар фици вуш, узуз агъю гъапІган, йиз юкІв архаин шул. ²⁰ Тимофейси, учвхъанди юкІв убгру жара кас адаруз. ²¹ Вари имбудар чпин хайирнахъ хъа, Иса Месигъ бадали вуйир гъич фужкІара дар. ²² Думу фукъан мюгъкамур вуш, учвуз агъячвуз, думу узухъди, Ужувлан хабар бадали бай адашдихъди фици шулуш, гъаци шула. ²³ Узуз, йиз ляхин фицидарихъинди илтІибкІнуш, агъю гъабхъимитІлан думу учвухъна гъауз миж кайиз. ²⁴ Агъайи, багарихъди узхъанра учвухъна гъюз шул, кІури, умуд тувразуз.

²⁵ Узу гъацира, эгер ихъ гъардаш Эпофрадитра учвухъна къяляхъ гъаиш ужу шул, кІури, гъисаб апІураза. Думу, йиз гъайгъу зигбан бадали, учву узухъна гъау йиз гъуллугъчи ва узуси саб гъагънакк ккайи йиз юлдаш вуйиз. ²⁶ Дугъаз учву рякъюз гизаф ккунди а, думу йишв'ин сикинди ктисурадар, гъялак духъна, гъаз гъапиш, учв ищцу гъахъну, кІури, учвухъна хабар дубшна, кІура. ²⁷ Думу гъаци хъузра гъабхъну ва даркІиди саб нуфт ими. Аммаки Аллагъди дугъан язухъ гъизигну, неинки дугъан, хъа гъацира йизра язухъ гъизигну – Аллагъдиз йиз дерд артухъ апІуз ккун гъабхъундар. ²⁸ Гъаци вуйиган, Эпофрадит хъа ахъю иштагъниинди учвухъна гъаъдиза. Думу учвухъна гъюб ичв ахъю шадвал хъибди, ва йиз дердра гъаму сабдиинди кам хъибди. ²⁹ Думу Агъайихъди



вуйи ичв гьардашси ахью шадвалиинди къабул апІнайн ва гьацдар адмийириз чпи лайикъ вуйибсиб гьюрматра апІури йихъай.
³⁰Фицики Месигьдин ляхнар бадали дугъан лик аьжалин даргнинин алди гьабхъну, дугъу чан уьмур гьайиф гьапІундайи. Гьаци дугъу учвхъан узуз апІуз дархъи кюмекар гьапІунзуз.

Месигь варидартІан заан ву

3¹Ахирки, йиз гьардшар, учву Месигьдихъди хъайивалихъди учвуз шадвалар ккун апІураза! Узу учвуз гьаммишан сабди-кан бикІурашра, эргри шулдарза. Миди учву гизаф бедбахтвала-риккан уьрхиди.

²Суннат апІури, бедендиз зиян тувру намуссуз „хуйирихъан“ ихтият йихъай! ³Гьякъ суннат дапІнайидар, ухъу вухъа, гьаз гьапиш, ухъу Аллагьдин Рюгъну хъаъри, Дугъан гьякъ гьуллагънахъа; Месигь Исайин уьмриинди ухъу заан, яни дамахлу вухъа ва му дюн'яйинубдихъан хъичІихнадархъа. ⁴Узхъан му дюн'яйинубдибисну гьузузра шуйзухъан. Эгер, шли-вуш му дюн'яйинубдин гьубзру бин азуз, кІури гьабшиш, дугъазтІан узуз дициб бин хъа ижмиб азуз. ⁵Йиз суннат бабкан духъну миржидпи йигъан гьапІнийи. Узу Израилин халкъдин арайиан вуйи Вениаминдин тухмиан вуза. Узу жугъдар вуйи абйир-бабарикан духънайи марци жугъуд вуза. Эгер Къанундихъди фици вува, кІури, гьерхруш, узу Къанун гьярф-гьярфди тамам апІру фарисей вуза. ⁶Йиз хъачІаккувал Аллагьдихъ хъугърударихъ хъергуб вуйиз. Къанунди дюз кІурайиб вари тамам апІури гьахъунза, гьаддин гьакънаан узук гьич саб тахсирра ктарзук.

⁷Аммаки гьадмуган узу гьазанмиш дапІнайи вари хъуркъувалар Месигь бадали гьамус узхъан гьадахъу мисал апІураза. ⁸Мидланра гьайри, йиз Агъа Месигь Иса аьгью хъпан къяляхъ вари имбуб гьич фукІа дарубси гьисаб апІураза. Думу бадали узу варибдихъан ярхла гьахъунза, гьаму дюн'яйиъ айиб вари гатІахънайи чІюрхяртІан багъади дарзуз. Йиз мурад-метлеб, гьапІнура, Месигь агуб ва ⁹узу Гьадгъахъди хъуб вуйиз. Сарун узу, Къанунди улупнайиб тамам апІидиза, кІури, жвуван жафайиинди Аллагьдин улихъ гьякъ хъуз хъибдизухъан кІури, гьаддихъ хъачІаркк-ну имдарза. Месигьдихъ хъугъигантІан Аллагьдин улихъ гьякъ хъуз шлуб дар – узу гьаддихъ хъачІарккназа. Гьациб хъугъвал



туврайирра Аллагъ ву. Узуз ккуниб сабтІан дарзуз: ¹⁰ Иса Месигъ аьгъю апІуб, яни Думу чІиви гъапІу ккудрат аьгъю апІуб. Узуз гъацира, Дугъан аьзабар пай апІуз ккундузуз ва, Гъадму гъачІиб-си дукІну, ¹¹ Гъадму чІиви гъахъиганси, узура чІиви хъидайкІан, кІури, миж кади гъузуз ккундузуз.

Улихъ хъайи метлеб тамам апІуз шерик йихъай

¹² Узуз, узу гъадму метлебарихъна гъафунза, пуз, ккунди адарзуз. Аммаки Иса Месигъди узу, гъадму метлебнахъна гъюз кІури, ка-дагънайир ву. ¹³ Гъардшар, йиз улихъ гъамциб къайда дебккназа: сарун гъапІу ляхнарикан фикир дарапІуб ва узуз айи вари къувват-ниинди апІуз ккимбу ляхнарихъ хъюгъюб. ¹⁴ Гъаци апІувалин мет-лебра узу пешкеш рубкъуз лайикъ хъувал вуйиз. Думу пешкеш – Иса Месигъдиланмина Аллагъди аьршариз дих дапІнайивал вуйиз.

¹⁵ Узуз учвкан фужар хъуркънаш, гъаму узуси духъну ккундий-зуз. Хъа эгер, саб фициб-вуш месэлайин гъакънаан учву жара-си фикир апІураш, Аллагъди гъадмура ачухъ апІидичвуз. ¹⁶ Фи-циб жюрейиинди вушра, гъачай, ухъу гъамусдиз хъуркънайи хъур-къувалар, аьгъювалар гъисабназ гъадагъну, яшамиш шулахъа. ¹⁷ Гъардшар, жарадар гъярайиси, учвура йиз рякъди узухъди думу ккунду. Уччу учвуз улупганси яшамиш шулайидариз фикир тувай. ¹⁸ Фицики, гизафдар, узу учвуз улихъна гъапиганси (гъа-мусра улариин нивгъар алди хъана кІураза), Месигъдин хачран душмнарси яшамиш шула. ¹⁹ Дурарин аьхир аьжал хъибди, ду-рарин алагъ чпин фун ву; чпиз нач дубхъну ккунибдиинди дурари фурсар апІури шулу. Дурари дюн'айин ляхнарикантІан фикир апІури шулдар. ²⁰ Хъа ихъ ватан аьршариь а. Гъадму ихъ Ватан-диан гъиди ухъу Уьрхру ихъ Агъа Иса Месигъ. ²¹ Дугъу, ихъ зяиф, аьжал хъайи жанар дигиш дапІну, Чансиб нур тувру Бедендиз илтІикІиди. Дугъу ихъ жанар вари дюн'я Чаз мютІюгъ апІуз гъиту къувватниинди илтІикІуз гъитди.

Алагъ ву умуднан, шадвалин ва мясляьтнан булагъ

4 ¹ Магъа гъаддиз, йиз ккуни ва дярякъди ктирсуз даршлу гъардшар, ккунидар, йиз шадвал ва гъалибвалин таж, Агъа-йихъди сатІиди, ижмиди дийигъну гъузай! ² Узу Эводияйиканна Синтихиййикан ккун апІураза: Агъайин ччвур бадали албагну



яшамиш йихъай! ³Узу увканра, йиз дугъри вуйи Сизиг, ккун апІураза: миннат вуйиз, кюмек апІин гьадрариз, фицики дурар кьюридра Ужувлан хабар бадали, узухъди, Клементдихъди ва имбу йиз юлдшарихъди (дурарин ччвурар Уъмрин китабдик ка), гъилихну.

⁴Агъайихъди саб духъну, гъаммишан шадвал хъапІай! Хъана кІураза: шадвал хъапІай. ⁵Гъит варидариз ичв фурс ктрувал рябкъ-ри. Агъа магъа багахъ хъа! ⁶Гъич сабдинна гъайгъушнаъ махъанай. Аммаки фицдар гъялариъ ашра, ккарагай, ккуниб ккун апІури, илтІикІай, ясана, чухсагъул кІури, илтІикІай, гъит ичв тІалабар Аллагъдиз агъю ишри. ⁷Хъа Аллагъдихъан гъюрайи, гъавриъ ахъуз даршлу, заан вуйи мясляятну, ичв юкІвар ва фикрар Месигъ Исайиъ уърхиди.

⁸Аъхирки, гъардшар, гъарган гъякъ вуйибдикан, лайикъ вуйибдикан, дюзваликан, марццибдикан, бегелмишубна гъяйранубдикан, намуслуваликан ва тярифарииз лайикъубдикан фикир апІинай. ⁹Узхъан гъудубгъуб, узхъан гъурубкъуб, узкан гъеебхъуб, узуъ гъябкъюб – вари тамам апІинай, ва гъадмуган мясляятнан булагъ вуйи Аллагъ учвухъди хъиди.

¹⁰Учву хъана йиз гъайгъушнаъ учІвну, узухъди илтІикІиган, узу йиз вари юкІв хъипну Агъайихъди сабси шадвали гъадагъунза. ИкибаштІан, учву гъаммишан йиз гъайгъушнаъ ачва, хъа гъамусдизкъан учвуз ичв гъайгъу узуз улупуз мумкинвал адайчвуз. ¹¹Узу мици, учвкан фу-вуш ккунди айивалиан кІурайиб дариз, фицики, узу фициб гъялнаъ ахънашра, узуз айибдиин разиди гъузуз гъудубгъунза. ¹²Узуз, касибди вушра ва ацІну ашра, яшамиш хъуз агъязуз. Уз’ин вариб улубкъунзуин ва варибдихъна гъязурра вуза: тухъвалихъна ва гаш’валихъна, девлетлуварихъна ва касибвалихъна. ¹³Узуз къувват Туврайирин кюмекниинди вари шулзухъан.

¹⁴Хъа вушра, узухъди йиз дердер учвур пай апІуб ужу гъапІунчва. ¹⁵Учвуз агъячвуз, Филиппдин агълар, узу Македонияйиан удучІвну, Ужувлан хабар рабгъуз хъюгъхъанмина, учвлан гъайри, Аллагъдихъ хъугърударин гъич саб жямаятди кюмек гъапІундарзуз. ¹⁶Учву Фессалоникдиз кмидира швнубсабан йиз яшайишдиз кюмек хътапІури гъахъунчва. ¹⁷Мици узу, учвхъан хъана гизаф пешкешар гъадагъурза, кІури, ваъ, хъа учвуз ичв пулилантина



ФИЛИПП 4

хъана гизаф хайир хъпан бадали апІурайиб вуйиз. ¹⁸Хъа узуз вари гьубкІну азуз, гьамус узуз ккунибтІан гизафра кади азуз. Учву хътапІуб вари Эпофрадитди тувунзухъна, гьамус варибдихъди ацІназа. Ичв багъишар Аллагъдин хулаз гъабхи «ицци ниъ хъади убгрубси», «къабул шлу гъурбан, Аллагъдиз хуш вуйи гъурбанси» гьисаб апІуз шулу. ¹⁹Ва йиз Аллагъдира Чан зурба вуйи девлетниинди, Месигъ Исайилантина вари учвуз ккунди имбубдихъди артухъра кади ацІдичва. ²⁰Аьсрариан аьсрариз ихъ Адашдин, Аллагъдин ад ибшри. Амин. ²¹Месигъдианмина Аллагъдин гирами халкъдик кидикънайи варидариз саламар йипай. Узухъди хъайи вари гъардшарира учвуз саламар хътаура. ²²Аллагъдин вари халкъди, иллагъки Римдин паччагъдин хуларий гьуллугънаъ айидари, учвуз саламар хътаура. ²³Агъа Иса Месигъдин уж'вал, гьит, гъарган ичв рюгънахъди ибшри!